



UKA15/113
13. Oktober 2015
Múte B. Egede

Naalakkersuisut oqartussaaffiit nunatsinnut angerlaassassarineqarsinnaasut ilanngussaq 1-imi allasimasut Namminersorlutik Oqartussat inatsisaani allasimasuni suliassaqrifiit pineqartut pillugit Naalakkersuisut nalunaarusioqqullugit peqquneqarnissaanik Inatsisartuni aalajangiiffigisassatut siunnersuut. Nalunaarusiaq, kingusinnerpaamik UPA2018-imi Inatsisartunut saqqummiunneqartussanngortitassaq, suliassaqrifiit ataasiakkaani tamani tulliuuttunik nalunaarsuiffiussapput:

- a. Suliassaqrifiup ingerlanneranut ullumikkut Naalagaaffimmut qanoq akeqarpa, Kalaallit Nunaannullu qanoq akeqassava illersorsinnaasumik suliassaqrifik ingerlatissappagu?**
- b. Suliassat ingerlannissaani piginnaasat suut eqquutsinneqassappat, Kalaallit Nunaanni Namminersorlutik Oqartussat suliassaqrifik ingerlanneqartumik illersorneqarsinnaasumik ingerlatsissaguni?**
- c. Iluaqutigineqartussat pitsaanngequtillu suliassaqrifiit ingerlanneqartut angerlaannerini suut kingunerissavai?**
- d. Suliassaqrifiit ingerlanneqartut angerlaannissaanni suliassat piffissami sivikitsup iluani, piffissami akunnattup iluani imaluunniit piffissap sivisuup ingerlanerani sularineqarlutik tulleriissarneqarnissai Naalakkersuisunit ingerlanneqartussaasorivaat?**

(Inatsisartunut ilaasortaq Aqqaluaq B. Egede, Inuit Ataqatigiit)

Siullermik Inuit Ataqatigiit aaliangiiffigisassatut siunnersuummut pingaarutilimmut siunnersuuteqartoq Inatsisartunut ilaasortaq Aqqaluaq B. Egede (Inuit Ataqatigiit) qutsavigiumavarput. Namminiilivinnissatsinnummi alloriarnerit tulliuuttut siunnerfissagut oqallisigisariaqarpagut taamaalillutami aatsaat ataatsimoorfeqarluta pilersaarusiogatiissinnaanerput angusinnaagatsigu. Tassa – massakut alloriarnerup tullia pimoorullugu tigusariaqalerparput siunnerfeqatigiinnissarpullu pisariaqarluinnarpoq.

Namminiilivinnissatsinnik siunnerfeqarneq ataatsimoorluta paaseqatigiillutalu suleqatigiinnissatsinnik piumasaaqatitaqarpoq. Suliassarmi imaannaanngilaq, Inuit Ataqatigiinniilli uppeaarput ataatsimoorluta anguniakkatsinnik angusaqarsinnaasugut.

Namminiilivinnissamik siunnerfeqarnerput tamatta sulinissatsinnik piumasaaqatitaqarpoq. Anguniagarpummi angussagutsigu piумаффигеqatigiittariaqarpugut suleqatigiittariaqarlutalu. Siunnersuummi oqartussaaffiit naalagaaffiup suli aqutaasa angerlaassorneqalersinnaasut pillugit Naalakkersuisut nalunaarusiornissaanik piumasaaqarneq Inuit Ataqatigiit tamakkiisumik taparserpaat. Inuiaammi namminiilivinnissatsinnut aqutissatta qanoq aqquusaagassaqarnera ersarissartariaqalerparput. Siunissamummi nalornineq pilersissanngikkutsigu maani inersuarmi siunissamik tikkuussisumik siunnerfeqarnissarput pisussaaffigaarput.

Namminersorneq pillugu inatsit annertuumik siammasissumillu imaqarpoq. Inuit Ataqatigiinniillu pisariaqartuusorivarput nunatsinniit naalagaaffeqatitsinnut ataatsimoorluta siunissatta qanoq ilusilersornissaanik siunnerfeqarnitsinnik oqariartorsinnaalernissarput. Oqariartorsinnaasariaqarpugummi suliassat uku tullinnguupput; taamaaliornitsigullu suliassani pineqartuni suleqatigiilluta angusaqatigiinnissatsinnik piumasaaqarsinnaassagatta.

Aaliangiiffigisassatut siunnersuutip sammisatta suliareqqinnerani ilannguttariaqarsoraarput oqartussaaffiit angerlaassugassatta aqunneqarnissaanik periutsit nunatsinnut tulluuttumik aqqissornissaat aamma misissorneqassasoq. Naammanngilarmi nunatsinni aqqissuussaansinnit danskit aqqissuussaanerannut malinneqqissaartuarnissaq.

Namminiilivinnissatsinni pisariaqarpoq nunatsinni nammineerluta maanga tulluartumik aqutseriuseqalernissarput. Imaanngitsoq suut tamarmik allanngortinneqassasut, kisiannili avaqqussinnaangilarput maanna aqutseriuseq aaqqissuuteqqittariaqaratsigu uatsinnut tulluarsarlugu. Taamaaliornissamullu oqartussaaffiit angerlaassugassagut aallartif-fissaqqissuupput.